

地 130.31
41
:6

部三

大 130.31
02

宣
化
縣
新
志

卷十三
人物志上

宣化縣新志卷十三

人物志上

宣化縣志成於有清康熙五十一年當明末清初居庸關外爲戎馬屯紮之區漢胡相戰歲無寧止故志中所載人物以武功著名者居多厥後迄今垂二百年昇平旣久武事遂廢然如文學孝友等事宜大彰於前代乃反不能及者何哉蓋人物之表彰也惟文是賴宣人多不文文者亦每視其文之不足傳卽有紀載亦皆散失無存而鄉老之傳說又苦於不詳甚或道其事而忘其名紀其事而略其年此所以二百年來之人物仍寥寥而已迨至有清末葉

宣化縣新志

卷十三 人物志上 一

西學東遷新進之士曰孝弟貞烈爲陳腐道德愈衰風俗愈薄求一名教完人間世幾不一遇而鄉農之孝弟貞烈發於天性者又乏人以述之茲謹博採若干事按其事之詳略而纂輯之旣彰往事且勸來者志人物

金

劉昂字子昂興和人大定十九年進士曾高而下七世登科昂天資警悟律賦自成一家作詩得晚唐體尤工絕句李純甫故人外傳云昂早得仕年三十三爲尙書省椽調平涼路轉運副使時術士有言昂官止五品昂不信俄以母憂去職連蹇十年卜居洛陽有終焉之志有薦其才於章宗者泰和初自國子司



業擢爲左司郎中會言者有所劾辭連昂降上京留守判官道卒竟如術者之言

舊志

盧孝儉宣德府人也天眷二年進士累官太原少尹大定二年陝西用兵尙書省發本路稅粟赴平涼充軍實期甚嚴迫孝儉輒易以金帛馳至平涼用省而不失期并人稱之官二階遷同知廣寧尹廣寧大饑民多流亡失業乃借僧粟留其一歲之用使平其價市與貧民旣以救民僧亦獲利累遷山東轉運使所至有德政云

金史本傳

元

梁樞字子極宣德人七歲學古詩文多奇語稍長從里師習詞

宣化縣新志

卷十三

人物志上 一一

賦輒棄不肯爲已而聞楊惟中建太極書院于燕京請德安趙復講周程張朱學授徒其中卽負笈往從歲餘悅然有得因辭歸杜門不出日與鄉中子弟演說四子全書由是從學者甚衆或勸之仕輒曰仕而無益于世釣名謀利耳竟不出晚嗜易以觀象名軒人稱爲象軒先生

舊志

劉敏字有功宣德府人元太祖駐師山後敏時年十二從父母避地德興禪房山兵至父母棄敏走大將憐而收養之一日帝晏諸將於行營敏隨之入帝見其貌偉問知所自俾留宿衛習國語聰慧遂得帝心帝征遼西及回回諸國悉收其地敏皆從行授安撫使便宜行事兼燕京路稅課漕運鹽場僧道司天等

事初耶律楚材總裁都邑契丹人居多其徒往往中夜挾弓矢掠民財官不能禁敏戮其渠魁令諸市又豪民冒籍良民爲奴者衆敏悉歸之選民習星歷者爲司天太史氏興學校薦名士爲之師太宗卽位授行尙書省治漢民憲宗卽位請以子世亨自代帝許之賜世亨銀章佩金虎符仍諭世亨以不從命者黜之又賜其次子世濟入宿衛帝伐宋幸陝右敏輿疾請見帝曰卿有疾不召而來將有言乎敏曰臣聞天子出巡義當扈從何敢言疾但中原土曠民貧勞師遠伐恐非計也帝弗納敏還退居年豐世祖南征過年豐敏入見諭之曰我太祖勵精圖治見而知者惟卿爾汝春秋高其彙次以爲後法未幾歸病卒

元史本傳

武恪字伯威宣德府人初以神童遊學江南吳澄爲江西儒學副提舉薦入國學肄業明宗在潛邸選恪爲說書秀才及出鎮雲南恪在行明宗欲起兵陝西恪諫曰太子北行于國有君命于家有叔父之命令若向京師發一箭史官必書太子反左右惡恪言乃曰武秀才有母在京合遣其回恪遂還京師居陋巷教訓子弟文宗知其名除秘書監典簿秩滿了內艱再除中瑞司典簿改汾西縣尹皆不起人或勸之仕恪曰向爲親屈今親已棄養不復仕矣居數歲會朝廷選守令秦不華舉恪爲平陽沁水縣尹亦不赴近臣又薦爲授經郎恪遂陽爲瘖瘂若不能應命也恪好讀周易每日堅坐或問之曰先生之學以何爲本

恪曰以敬爲本所著有水雲集若干卷其從學諸生多所成就凡居要官以賢名者蓋十數人云

元史本傳

潘澤字澤民宣德府人初從許魯齋學歷仕課最擢知宏州兼諸軍奧魯始有土民以行所學郡早徧禱不應乃詣郭西泉投文祝之明日大雨乃爲屋祠龍泉上先是州南大風爲災又禱之以文風災遂息州民德之州向繫疑盜八人求迹無所澤明其非辜皆出之未幾眞盜盡獲太原民有從貴家奴得僞鈔獲罪者待命他郡過治號于市曰神明如公獨不能相活耶公訊得其情上之事遂息列職中外善政聿多終于浙西道肅政廉

訪副使

餘詳藝文

宣化縣新志

卷十三

人物志上

四

明

孫剛宣府前衛人由軍功陞都指揮僉事守備永寧正統十四年秋敵寇獨石馬營守臣楊俊棄城遁遂犯雲州剛率永寧兵援之至中途遇賊數萬騎且戰且行兵寡不敵死之賜祭祀義烈祠子成官至遼陽總兵

宣鎮志

江福宣鎮人正統中都督同知土木之變中官喜寧隨英廟北狩兩引衆寇邊索金帛無厭中外苦之景泰改元福爲萬全右衛守備寧遣腹心高璽來邊佯言議和實欲誘我軍出而襲之福覺因與璽結歡動以忠義璽頗泄其情福遂以圖寧事密告璽璽應諾福慮賊情譎詐請總兵朱謙楊俊各率兵伏野狐嶺

左至期寧果遣璽先來會盟福令壯士十餘人皆衷甲外飾常服各執饌具出關迎寧邀寧奉酌寧初有難色璽從旁贊勸遂下馬相勞苦如平生酒行福目壯士就擒之關內伏兵疾馳而出喊聲動地敵見墮計皆遁去並擒其酋火力火孫英廟旋得回鑾福之功也時有攘其功者福不與爭人以爲難

宣鎮志時宣府總兵

楊俊冒其功後事露帝宥俊別賞福

王偉字士英攸人隨父謫戍宣府年十四宣宗巡幸塞上獻安邊頌命補保安州學生舉正統元年進士由庶常改授戶部主事英宗北狩命行監察御史事集民壯守廣平兵部尙書于謙重其才引爲職方司郎中軍書填委處分多中窾嘗上疏凡事

宣化縣新志

卷十三 人物志上 五

關機要請聽堂上官面陳又請專將權使得自斬裨將以下爵賞便宜從事母令中制帝嘉納之超擢兵部左侍郎出視邊小田兒者本中國人叛出塞爲邊患謙屬偉圖之會田兒隨貢使入至陽和城壯士從道旁突出斷其頭去使者不敢結後坐謙黨罷歸成化中復官

明史本傳

按本傳偉爲謙所引而朝臣多嫉謙與謙善者率目爲朋黨偉乃伺謙誤密奏之事類巧宦所爲然復官後卽請毀白琦所鏤榜偉等罪版此亦足以補過故錄

楊洪字宗遠開平百戶善騎射成祖北征至幹難河獲人馬還帝曰將才也令識其名累功進都指揮僉事英宗立時先朝宿

將都盡洪後起敢戰大臣並知其能有毀之者輒爲曲護洪由是得展其才自宣德以來迺北未嘗大舉其擾邊者多不過數百他將率懼慙洪獨敢戰遇敵輒有斬獲迺北亦懼之呼爲楊王嘗建議加築開平城拓龍門所自獨石至潮河川增置墩臺六十形勢相接十二年充總兵官鎮宣府景泰卽位也先逼京師詔洪將兵入衛比至寇已退追擊餘寇之霸州還所掠人畜萬計以功進侯命留京師督軍營訓練掌左衛事朝廷以洪宿將所言無不納嘗陳禦寇三策又奏簡汰三千諸營將校又與石亨等請釋官聚王喜張斌三人罪帝並從之其秋予世券佩鎮朔大將軍印還鎮宣府居數月以疾召還京卒帝震悼賜祭

宣化縣新志

卷十三 人物志上 六

葬贈穎國公諡武襄洪爲一時邊將冠頗好文學親儒者嘗請建學宣府教諸將子弟識者多之子傑嗣爵早歿無子庶子俊襲之天順中以罪伏誅其兄子能信能天順初以左都督爲宣府總兵與石彪破敵磨兒山封武強伯信字文實景泰中累進都督僉事代兄能鎮宣府上言每陣宜置鹿角十具臨陣可捍敵馬結營可衛士卒遇敵團牌拒前鹿角列後神銃弓矢相繼迭發則守無不固戰無不利從之天順初移鎮延綏累功封彰武伯成化六年分道出塞擊敵於柴溝獲馬五百匹璽書褒之信在邊三十年鎮以安靜人樂爲用卒贈侯字武毅

明史本傳

朱謙開平人宣德元年以北征功由指揮使進萬全都指揮僉

事正統六年與叅將王眞巡哨遇敵連擊敗之八年與楊洪破兀良哈于克列蘇累功進都督同知帝北狩也先擁帝至宣府城下令開門謙與叅將紀廣御史羅亨信不應遂去尋代楊洪鎮守宣府景泰元年五月敵入犯謙率兵禦之次關子口數千騎突至拒以鹿角火器擊之少却如是數四謙退軍敵復追之都督楊福來援失利謙軍亦傷卒力戰却敵踰月敵二千騎復南侵遣都指揮牛璽等禦之戰南陂謙見塵起率叅將范廣等馳援自己至午敵敗遁論功封撫寧伯敵屢擾宣府大同意二城可旦夕下而謙守宣府郭登守大同數以羸師挫其勁騎也先知邊城難犯始有還上皇意明年卒于鎮成化中謚武襄子

宣化縣新志

卷十三 人物志上 七

永字景昌旣嗣爵分領宣威營改督團營成化二年荆襄盜劉通作亂永與尙書白圭討平之阿羅寇延綏永偕都御史王鉞都督劉玉劉聚等擊大敗之牛家寨明年復敗之混忽都河十九年秋小王子大入邊宣大告急以永爲鎮朔大將軍督諸將周玉李璵等擊敗之永治軍嚴肅所至多奏功前後八佩將軍印內總十二團營掌都督累進保國公賜世襲加大保宏治九年卒追封宣平王謚武毅

明史本傳

按胡史楊洪朱謙列傳所傳世爵洪昌平侯爵早廢獨信爵襲封三傳至曾孫炳隆慶時掌京營戎政屢加少師謚恭襄炳傳至孫崇猷闖賊陷京師被殺贈彰武侯朱永子

暉襲爵總督京營加太保暉子騏襲侯出鎮兩廣以軍功加太子太保騏數傳至國弼天崇間嘗請正魏逆罪及劾輔臣溫體仁福王立復進保國公以與馬阮相結令名不終蓋二姓襲暉並傳至國亡云

周賢世襲宣府前衛千戶景泰初累功至都指揮僉事守備西貓兒峪助副總兵孫安守獨石八城尋充右參將代安鎮守兀良哈入寇總兵官過興令宣府副將楊信及賢合擊賢不俟信徑擊敗之被劾都御史李秉言信緩師賢亦棄約帝兩宥之天順初總兵官楊能奏擢都督僉事能以寇駐塞下檄賢與大軍會失期徵下獄以故官赴寧夏隸石彪軍寇入安邊營賢擊之

宣化縣新志

卷十三 人物志上 八

大敗窮追中流矢而卒

宣鎮志賢守開平敵寇陝西詔賢往援至野馬澗等處力戰六日斬獲甚衆復

賊於榆林安邊營援兵不繼遂死於敵

賢初下吏自以不復用及釋罪感激誓死

報竟如其志贈都督同知子玉字廷璧充宣府遊擊成化九年詔與將才玉爲首命率所部援延綏從王鉞襲紅鹽池還守宣府寇入馬營赤城擊敗之又破敵於紅崖兒累進署都督同知佩征朔將軍印十九年小王子犯大同敗總兵許寧入順聖川大掠以六千騎寇宣府玉將二千人前行巡撫秦紘繼進至白腰山擊敗之時寇乘勝氣銳甚爲玉等所挫一時稱其功未幾寇復入王伏兵敗之復會朱永軍敗之鵠鴿谷進署右都督後

調鎮寧夏卒諡武僖

明史本傳

倪岳字舜咨

宣鎮志

本上元人隨父文僖公舉天順八年進士

累官翰林學士直講東宮進禮部左右侍郎宏治六年拜禮部

尚書時四方所報災異禮部於歲終類奏率為具文岳乃詳次

其日月博引經史徵應上之勸帝勤講學開言路寬賦役慎刑

罪黜奸貪進忠直汰冗員停齋醮省營造止濫賞帝頗採納九

年改南京兵部參贊機務還為吏部尚書岳有文武才善斷大

事前後陳請百餘事軍國弊政剔抉無遺疏出人爭傳錄之卒

贈少保諡文毅明世父子官翰林俱得諡文自岳始

明史本傳

金陵瑣事岳為禮部時議者欲改定孔庭從祀及七十二子之祀岳力持之岳父子俱有文集傳世

劉寧字世安世襲永寧指揮勇敢善戰會延綏用兵疏請效死

宣化縣新志

卷十三

人物志上

九

尚書白圭許之累功充宣府遊擊周璽字廷玉襲職開平指揮
負氣習兵書善騎射以征北功充右參將分守陽和成化十八
年寇分道入掠璽與遊擊董昇戰黑石崖甯戰塔兒山皆有功
明年秋亦思馬因大入大同總兵官許寧分遣璽守懷仁寧與
董昇守西山寇至寧被圍數重亟發巨炮擊賊多死璽兵來援
夜遇敵勵將士曰今日有進無退大呼陷陣敵少却久之短兵
接臂中流矢拔鏃戰益急時璽子鵬亦從戰會寧亦潰圍出兵合寇乃
退無何復入掠寧將兵三千連追擊敗之二人並著功北邊稱
名將璽後佩征西印鎮寧夏臨卒召諸子曰吾佩印分闡分已
足獨未嘗大破敵抱恨入地矣連呼殺賊而瞑子鵬累官錦衣

衛指揮僉事璽沒後三年而寧佩平羌印鎮甘肅敗寇於抹山墩復與巡撫許進襲破哈密進左都督卒贈廣昌伯

一明合史傳一又傳載寧

有膽智爲大同副將時入貢者數萬人懷異志寧率二十騎直抵其營與諸部長坐舉策指畫宣天子威德一人語不遜寧擲其面奮臂起其長喝之退寧復坐與部呼酒歡飲皆感悟卒如約嘗仿古番上法以五十人爲隊隊五重爲陣建五色旗又各建五巨幟于中軍中幟起五陣各視其色應之循環無端每戰用是取勝

李經字士常宣府前衛人成化戊戌登進士由庶吉士進雲南道御史出按河南鋤治豪強扶植良善吏民畏愛之懷慶彰德諸府旱死徙數萬計上疏請採全活甚衆以積勞致疾卒于官

宣鎮志

張俊宣府衛人嗣世職爲本衛指揮宏治十二年以功進都指

宣化縣新志

卷十三 人物志上 十

揮同知火篩入大同右衛大掠八日俊遣兵三百邀其前後分兵三百應之而親禦之荆東莊依河結營擊却三萬餘騎擢都督僉事旋移鎮宣府中官苗達督師延綏檄大同宣府卒爲探騎俊不遣達劾俊部議俊所守當獲宥武宗初立寇乘喪大入連營二十餘里俊遣諸將李稽白玉張雄王鎮穆榮各帥三千人分扼要害俄寇由新開口毀垣稽遽前迎敵玉雄鎮榮各率所部拒于虞臺嶺俊急率兵千人赴援道傷足以兵屬督指揮曹泰泰至鹿角山被圍俊力疾益調兵五千人持三日糧馳解秦圍復援出鎮又分兵救稽玉稽玉亦潰圍出獨雄榮沮山澗援絕死諸軍已大困收兵還寇追之行且戰得入萬全右衛城

事聞徵俊還御史郭東山言俊扶病馳援勸賞不宜偏廢乃詳贖罪正德五年起署都督同知明年充副總兵官以邀擊劉六劉七等賊有功賜白金授都督同知卒俊爲邊將持廉有謀勇其沒也家無贏資

明史本傳

熊偉字彥卿宣府人宏治丙辰進士選兵科給事中凡所建白多見採行已未拜通政司參議甲子小王子求貢甚急已而不來有被擄人言其議槍黃裏黃裏指京城也又言朶顏頭目可兒乞蠻往北地通和小王子與一女寄養似有引誘入寇之跡於是上擇有才望者邊關經理以偉往至居庸紫荆上十議一簡將帥二增甲卒三別勇怯四核功罪五峙芻糧六習騎技七

宣化縣新志

卷十三 人物志上 十一

設險阻八明斥堠九慎機權十任間諜上稱善命以次舉行正德丙寅還朝尋出巡撫大同爲中官所搆落職既歸閉戶勤著述卒年八十六有雙溪集行世

宣鎮志

楊百之字允成宣府人性敏睿能文登正德甲戌進士授行人擢御史一時風裁獨著江彬者鄉人也每因人誘致百之婉詞以謝竟不一及其門已卯巡京通二倉豪猾無敢滋弊辛巳出按遼東廉武吏禁豪強振文教輿人頌焉嘉靖癸未擢廣西按察使以親老乞終養歸與鄉人張儀部鏜相善鏜亦恬靜狷介巡撫劉源清及巡按李宗樞並薦二人百之堅不出鏜出爲山西副使旋亦乞休歸

舊縣志

賀榮宣府軍校隨營禦敵千家營力戰而死宣鎮志

張濂字景周宣府人正德進士歷河南鹿邑浙江海鹽知縣百姓譟之行取山西道御史清理江北諸衛班軍會歲稔濂計廩先給軍樂于行尋往監陝右瀕行權要人示意某可舉某可劾至則廉之嘆曰吾能枉是非媚人取大官耶卒以實狀上因憾之以事改大理寺評事尋出爲山西按察使襄民周朝者妖人也率黨破縣城殺令濂兩夜馳至捕之事平權要人復指爲罪落職歸徜徉林壑訓子課農置時事不問士大夫高之年七十六卒宣鎮志

孫世芳字克承宣府前衛人嘉靖丁未會試第六人館試稱旨

宣化縣新志

卷十三 人物志上 十一

欽擢第一授翰林院庶吉士陞檢討分校會試所取多知名士侍穆宗於潛邸撰進講義多有啟沃轉國子司業以興起斯文爲已任甲子主試應天卒于闈中所著有宣府鎮志紀明代邊事與尹耕兩鎮三關志並稱舊縣志

穆得海葛峪人王羊兒白陽人並成卒嘉靖丁亥隨主將關山禦寇得海躍入陣生擒一人斬以勵衆寇聚衆圍射之手刃數賊力竭而死王臨陣蹲甲對射矢無虛發亦力戰死其父收屍見其手內携一賊首人皆壯而哀之宣鎮志

周冕字文中宣鎮人官都指揮僉事嘉靖戊戌夏六月敵由萬全右衛入至鎮城西北二十里總兵郝鏜令冕以本營精銳兵

禦之戰死宣鎮志

丁璋字文佩宣鎮人嘉靖丁酉被薦陞永隆參將戊戌八月朶顏潛師夜抵隆慶璋倉卒出禦部曲多未集戰不利身被數創尚手刃八級寇自解去辛丑陞署山西副總兵秋七月俺答阿不孩率大兵由陽武峪掠寧偏雁門璋禦戰敗其先鋒已而寇衆擁至環圍數重苦戰不得出力竭而死事聞賜祭贈廕宣鎮志

董陽宣府前衛人嘉靖中為宣府遊擊將軍俺答犯滴水崖陽力戰死贈官錫廕春秋世祀明史董一元傳
續鎮志 陽字子

俺答阿不孩率十萬衆寇山西陣太原城下陽時以遊擊將軍領所部兵往援遇之突入其陣即斃數賊已而敵四面合圍陽奮臂大呼躍馬舞劍而出萬衆辟易已酉敵寇隆慶永寧鎮守官趙卿方被論賜瀚代領其兵禦之敵分為二背面夾攻兵敗

宣化縣新志

卷十三 人物志上 十三

二將猶揮刃力戰殺數十賊而死

任鎮宣府右衛人守備西路與參將史略同戰死時嘉靖壬子

歲懷安志

祁勉字效勤宣鎮人嘉靖癸丑兵部中式累官中路參將分守萬峪堡諸處未幾罷官候代適寇至勉曰我固當去然義不得避艱險仍率所部以往被圍力戰死時嘉靖三十六年也事聞贈恤有加勉姪謀參將助子以諸生承勉廕指揮僉事嘉靖四十三年授大同老營堡守備本年寇入謀禦之死于陣蔚縣志

王國宣鎮人嘉靖癸丑寇犯保安以千戶隨參將郭都往禦國身先士卒血戰而死詔贈卹如制宣鎮志

董國忠宣府人嘉靖甲寅守備懷來撫馭有方夏六月大雨山水暴至城門不能開國忠拜禱泥中爲闔城請命門忽自開懷邑頻年荒歉賴其區畫得以全活己未署東路遊擊北部入寇報至不俟援兵奮義迎敵死於楊家山朝廷褒封陞其子尙文都指揮使

懷來志

蔡隆萬全右衛人嘉靖丙辰禦寇黑沙梁身被數創而死事聞贈都指揮僉事附祀叅將李光啟祠

宣鎮志

張鉞萬全右衛軍校嘉靖乙卯四月內叅將郭震命赴鎮城報邊事夤夜遇寇執而問曰寧遠堡門可入否汝引之乃生汝鉞應曰必不得入且內多壯士久爲備正俟汝背磔之耳堅不肯

宣化縣新志

卷十三

人物志上

十四

引被殺堡人感而祀之

宣鎮志

潘洪宣府前衛百戶嘉靖丁巳擊寇戰死

宣鎮志

張鎮宣府軍校己未寇犯薊州隨營往援力戰死

宣鎮志

馬芳字德馨蔚州人周尙文鎮大同奇之署爲隊長數禦寇有功當得官以家貧僅受賞以養父嘉靖二十九年秋寇犯懷柔順義芳馳斬其將授陽和衛總旗寇嘗入威遠伏驍騎鹽場而以二十騎挑戰芳知其詐用百騎薄伏所三分其軍銳以次擊之奮勇跳盪敵騎辟易十里斬首凡九十級復禦之新平寇營野馬川剋日戰芳度寇且遁急乘之斬擊益多衆方駕芳策馬曰賊至矣趣守險而身斷後頃之寇果麕至戰益力寇乃去又

戰泥河大破之屢功進左都督賜蟒服偏裨加都督自芳始二十六年遷薊鎮總兵分守建昌土蠻十萬騎薄界嶺口芳與總兵官歐陽安斬首數十獲驍騎猛克兔等六人寇不知芳在芳免胄示之驚曰馬太師也遂遁辛愛把都兒大入芳追擊之尋移守宣府寇大入山西芳一日夜馳五百里及之七戰皆捷四十五年七月辛愛以十萬騎入西路芳迎之馬蓮堡堡圯衆請塞之不可請登臺亦不可開堡四門偃旗寂若無人比暮野燒燭天囂呼達旦芳臥日中不起窺者相屬莫測所爲明日芳蹶然起乘城指示衆曰彼軍多反顧且走勒兵追擊大破之隆慶初或爲辛愛謀以五萬騎寇蔚州誘芳出而以五萬騎襲宣府

宣化縣新志

卷十三 人物志上 十五

可得志芳豫伐木環城寇至不可上遂解去頃之率參將劉澤等出獨石塞外二百里襲其帳于長水海還至塞追者及鞍子山迎戰又大敗之芳有膽智諳戰守所至先士卒一歲數出師搗巢或躬督戰或遣裨將家蓄健兒得其死力嘗命三十人出塞四百里多所斬獲寇大震芳乃帥師至大松林頓舊輿和衛登高四望耀兵而還後芳復移鎮大同又鎮宣府以病乞歸又二年卒芳起行伍十餘年爲大帥大小百十戰身被十餘創以少擊衆未嘗不大捷擒部長數十人斬馘無算名震邊陲爲一時名將冠二子棟林棟官至都督林有傳

明史本傳 蔚州志 棟字慎齋 由指揮同

知歷寧武薊鎮總兵嫻韜略多文雅工徑尺大書

董一奎字天宿號北山陣亡遊擊陽長子也襲父職嘉靖乙卯以功陞指揮僉事歷官宣大寧武古北延綏洮岷總兵萬曆壬辰佩征西將軍印鎮守寧夏時叛兵許朝倅劉櫻城拒守卽于城外任事晝夜不解甲者八十餘日鎧葉被汗蝕孔殆遍癸巳冬倭酋關白遣使求封兵部尙書石星以一奎曾援朝鮮備知倭情特以一奎主宴并欲舉爲封倭正使遊擊沈惟敬暗與倭通往謁問倭事一奎曰馳至釜山視其情形或眞或僞當詳實具奏耳惟敬懼阻之乃言于石曰倭素能詩恐非董所長石惑其言遂以臨淮侯往而倭竟敗盟時皆惜其不果用一奎也乙未調鎮山西後致任歸

續鎮志

董一元字小山陽子奎弟嘉靖時歷薊鎮遊擊拒寇一片石及破敵棒槌崖功俱最累官總兵兩守宣府萬曆中練兵西寧火落赤入犯擊之西川尋鎮延綏乘倅拜西掠以輕騎搗土味巢多斬獲時遼東鎮將失事廷議擇帥乃以命一元泰寧速把亥爲官軍所殺其次子把兔兒欲復讐結西部卜言台吉爲倚至是卜言合一克灰正腦毛大諸部聲犯廣寧而把兔兒以炒花大煖兔伯言兒子衆營舊遼陽將入掠鎮武錦義一元乃遣副將守廉馳右屯禦西部而親將大兵懸鎮武外爲空營待之寇騎馳入營大笑以爲怯乃深入官軍忽從中起奮呼陷陣自午至酉寇大奔逐北七十餘里至白沙塌俘斬獲馬駝無算伯

言兒中矢死把兔兒傷餘衆終夜馳天明駐馬環哭其明日卜
言入右屯攻守廉不下亦引去時二十二年十月也

一元尋復
提健卒乘

雪度墨山抵其巢把
兔兒竟死諸部遠遁捷聞進左都督加太子太保世廕指揮使

明史
本傳

解一清字汝澄號竹泉宣府人祖鏞指揮同知一清少孤襲職
後遷守備請修迎恩堡雉堞及監築滴水崖長城總督吳兌計
軍一清為最官至總兵一清習邊務所至俱有裨益其為臺頭
參將時南兵戍邊當事減其糧餉遂鼓噪而叛一清遮于路歷
數利害解散之陞寧夏副總兵寧夏每冬修牆士卒多凍死一
清曰銳氣挫於險塞糧食竭於築邊甚非策也條議罷之調薊

宣化縣新志

卷十三 人物志上 十七

鎮甫蒞事三屯營卒叛將甘心於減餉者諸將倉猝不知所為
計一清單騎追止之力言於中丞復其餉亂乃止擢昌平總兵
寧夏兵亂以一清素得寧夏心移令彈壓中丞某被譴力為疏
救副總兵某驕蹇不法劾之竟治罪以積勞致疾力請歸逾月
卒訃聞賜祭

續鎮
志

胡載道字文甫宣府人幼孤事繼母劉孝謹友愛兄弟不問資
產萬歷丁丑成進士授廬州府推官條上均賦役通制錢抑刁
訟清屯田嚴保甲限皂快覈追徵恤軍吏八事皆見施行讞獄
恥為深文多所平反時河決高堰司空潘季馴檄督河工築堰
濬淤河歸故道薦進一級癸未行取郡國第一以忤當道補駕

部主事巡視皇城肅清禁旅出判兩浙鹽運大有興革商竈稱便轉南京戶部主事致仕

續鎮志

黃明臣字國瑞先世彭澤人明初調戍占籍宣府由千戶歷永寧參將永寧爲寇出入孔道民居星散有警倉卒逃避黃度道理遠近築堡置戍隨地守禦人以爲堅城北部嘗渝盟由四海冶入寇預偵知之身先士卒獲寇哨騎歸其半而質其半諭以禍福皆噬指駭散相戒勿敢犯內地史車二部驕黠時引外寇乃與約法賞罰必行共輸服焉會邑令趙欲興學造士而阻於無費明臣乃引爲己責延學官率子弟講業經費不煩有司是科寧遠遂獲售一人盛備燕飲共帳并厚給之以勸來者擢昌

宣化縣新志

卷十三

人物志上

十八

平總兵去任邑人思之爲立祠明臣幼孤事孀母孝嘗拾金百

兩迹其人還之

續鎮志

許國忠宣府人任南路蔚州叅將萬歷二十二年奉調征倭進

攻開城北啼尙州金羅遇敵力戰而死

舊縣志

黃鈇字龍門總兵黃明臣長子由世襲任陝西寧夏中衛參將

因援遼戰歿於鳳集

續鎮志

祝國忠字秉直宣府人世襲指揮萬歷四十六年七月與弟國良從劉挺杜松黃鉞等援遼於清河對敵兄弟先後力戰陣亡崇祀褒忠祠先是其祖名爵者字殿侯以世襲千戶於嘉靖三十四年五月隨總兵歐陽安勦賊於龍門之石人嵯歿於陣予

世襲蓋一門三忠云 舊縣志

頗廷相字清野 續鎮志 宣府人慷慨有膽略善譯夷語每遇戰

陣以身先士卒多所斬獲歷遼東副總兵萬歷四十六年撫順

陷廷相死之長男重光聞父戰沒奮勇縱鐵騎直搗重圍力戰

而死四十七年贈廷相都督同知襲陞二級重光實授百戶准

世襲部題現在廷相嫡長孫廣寧應襲祖職并承父官次男重

耀宜襲父陣亡三級從之 舊縣志 援遼見勢不敵諭衆曰我受國殊恩

三賜蟒玉誓以死報爾兵衆願回者聽令吾子收吾屍足矣勿

同盡衆皆感泣願致死無一肯還者相持數日俱戰歿報至子

重光年甫十九大勳日爲臣死忠爲子不宜死孝乎隨集家衆

往其陣亡兵丁子弟亦各號泣願從選精銳三百星馳尋父屍

不獲亦與衆血戰死事聞賜忠臣孝子匾額建祠祀之時國朝

將某憫其一門忠孝亦厚恤其家屬

宣化縣新志

卷十三 人物志上 十九

張國柱字君用宣人少有勇力嘗臥一所恍惚作彪形人奇之

以世胄起家初鎮山西次遷薊門最後佩征西將軍印守雲中

凡三總大鎮兵居官善撫士卒居家孝事繼母鄉黨恃以緩急

推爲長者天啟初宣士科名阻抑直指疏陳之是科得中三人

張與有力焉年七十六終子名世工行楷書生平多義行崇禎

時補中書舍人鼎革後撫臣欲薦起之固辭避去自號東臯野

叟以子光烈貴贈中憲大夫光烈順治進士累官平陽府同知

歷有政績初知夏邑嘗煮粥賑饑禁民鬻子委署臨汾請革除

加耗雜派等銀省民財萬計其待知交尤敦古誼云國柱名世

並祀鄉賢 舊縣志

滿桂蒙古人家宣府勇敢便騎射每從征多斬馘爲總督王象乾所知歷喜峰口叅將天啟二年大學士孫承宗行邊桂入謁承宗壯其貌與語兵事大奇之卽擢副總兵領中軍事承宗幕下文武輻輳獨用桂桂椎魯甚衆笑之然忠勇絕倫持身廉無聲色好與士卒同甘苦明年承宗議出關修復寧遠桂慨然請行置酒餞之桂至寧遠與袁崇煥協心經度屹然成重鎮四年二月桂偕總兵尤世祿襲蒙古部落於大凌河諸部西竄東鄙以寧拱免宰賽炒花諸部陽受款而陰懷反側桂善操縱諸部咸服歲省撫賞費不資初城內外人跡蕭然至是軍民五萬餘家屯種至五十里遠近承宗表其功詔擢都督僉事加銜總兵

宣化縣新志

卷十三 人物志上 一二十

承宗乃令典後部與蒙古戰多斬獲督餉郎中楊呈秀剋餉軍變桂與崇煥追斬首惡撫餘衆而還大清兵來攻桂累出戰以功進左都督復命掛印移鎮關門兼統諸路軍賜上方劍崇禎元年代渠家楨鎮大同遍歷八路七十二城堡大修守備軍民恃以無恐明年皇師入近畿桂帥五千騎入衛其年十二月大兵自良鄉回桂軍永定門外對陣兵寡不支與孫壽祖俱戰死帝聞震悼贈少師賜祭葬命有司建祠

明史本傳

甄奇傑宣府人崇禎中武探花累官總兵鎮守保定總督孫稱其一身是膽有保疆斬馘獲餉全城之功疏薦之特陞掛印總兵世襲左都督移鎮南陽會勦闖賊乙亥七月同孫撫賞都司

名洪猷者陣亡於棗陽地方先是甲戌五月奇傑有族人諱詳

者官峪山副總兵亦戰死峪山

舊縣志 續鎮志作保安參將戰歿廕一子錦衣千戶

金國鳳

續鎮志作宣府人

崇禎中以副總兵守松山大清以重兵來攻

用大炮四面齊擊臺堞悉摧壞國鳳率將士死守城中人負扉以行其摧壞處隨以木石補塞大兵分道穴其城國鳳隨方固拒終不下閱三十五日圍解立擢署都督僉事為寧遠團練總兵官其年十月大兵復攻寧遠國鳳出據北山岡力戰衆寡不敵與二子俱死朝廷痛悼贈特進榮祿大夫左都督賜祭命有司建祠並增世職三級國鳳父子柩歸命所過有司給舟車又加二祭後復廕一子世襲百戶

明史本傳

宣化縣新志

卷十三 人物志上 二十一

李齊魁字郁吾萬全都督庠生入監授桂王府長史王知其才俾侍世子講讀迨羅兵亂王窘迫屬以大事齊魁倉卒受托孤之任竭忠自效事不獲濟負王子出逃溺水死其妻史氏聞之

亦自殉

西寧縣志續志作齊槐

姚時中字我權宣府人有文行為鄉里宗崇禎甲申聞流寇將至語人曰寇深矣當事有死無生者朱中丞一人而已余當從其後三月流寇入城時中從容肅衣冠自縊于學宮正殿之西懷中有詩曰報國無權偷生不義竊比夷齊乾坤正氣何用此身惟有一死妻子無知付之不計郡人建朱公祠時中從祀焉

舊縣志

申以孝宣府衛人原任山東鄒城縣丞

明史稿作知縣

致仕家居聞流

寇破城投井死其子都司學生旺見父投井亦觸柱死有兩忠

貫日門額

續宣鎮志

黑雲龍字從吾先世大同人父曉少被寇擄後乘間脫歷充伍為宣府人嘉隆間歷官宣府遊擊時稱曉將雲龍襲父職天啟七年累官至宣府總兵以事落職崇禎己巳都中震驚雲龍從大將軍滿桂赴援召對獻策帝知其能起山海總兵命統新募兵衛都門兵皆市井無賴非素練遇陣披靡矢貫其頰過頤墮馬被執百計窘之不屈乃羈縻之至邊誘殺其監者二人奔回被陳虛實松山圍得解進後軍都督給假歸里值流寇破城罵

宣化縣新志

卷十三 人物志上 一二十二

賊死

續鎮志

溫洵字太和萬全右衛學生崇禎十七年闖賊入宣府屬城皆陷偽防禦路某來守萬全毀南關民舍大肆殺掠洵憤甚懷刃往刺之為賊所獲嚴加考掠瀕于十死不少屈會賊敗逃出獄後以貢生任阜城知縣

萬全縣志

黃鉉字九玉宣府人以明經授閩鄉知縣凡四年閣部史可法

題授淮漕監紀累進兵部郎中隨史閣部督師陞兵備道揚州

破鉉伏劍死

舊縣志

門寧字靜之宣府左衛人成化五年貢入太學授直隸南和縣令抵任卽慨然曰吾所學正在今日首詢民利病而興革之凡

百所需不擾民財民有貧而婚喪量爲資助尤能防備旱澇積
麥採荒政通人和百廢具舉及考最民爲立石縣廳後以疾辭
葛鵬字子高宣人也勵志問學與其弟鷗自相師友日研究聖
賢經傳往復辯正必底洞徹乃罷正德己卯同薦順天鄉闈辛
巳鷗登進士鵬不遇旋歸書舍奮修倍恒鷗仕爲給事中詒書
諷以剛直任事爲郡守諷以恤民無任情爲憲副諷以持大體
不苟於正鷗亦忻忻樂從之曰兄教我嘉靖壬辰春其業不合
有司者五未幾病卒鵬性好古其學篤尙躬行茹服不求旨麗
居家能養親友愛弟鵬待賓客儉素誠款與人交無一僞飾人
有慕者往造初若近迂久之必加欽服或歎爲眞君子焉

舊縣志

宣化縣新志

卷十三 人物志上 一二十三

張凌霄字雲翼宣府人幼失怙食貧茹荼攻舉業督學每試必
冠其曹餼於廩有年不獲一售京兆授徒里中養母李以節孝
顯明崇禎末由歲貢任棗強訓導值流寇亂歸欲倡道塞上有
陶斯吟一編人多莫能解遂益專志著述其爲人剛方言有條
理平生博覽尤邃於堪輿星命年八十餘猶不杖而行鬚髯雪
皚飄飄如地仙無疾而逝

同上

姚世卿字獻吾宣府前衛人明萬歷戊戌武進士歷官鎮守大
同掛印征西將軍左都督天啟四年察汗與敖木諸部擁衆雲
鎮邊外及款市復通矢謨爲多崇禎己巳丙子以在籍宿將兩
經入衛及解嚴之日褒勞孔嘉推轂方殷無何遘疾終有司以

聞追錄事功特予祭葬其諭祭文有云講讐矢勉而烽煙息警巖疆收樽俎之猷捐貲易贏而星夜兼程都門重金湯之寄蓋

紀實云

同上

張邦奇夢吉之父由鎮撫登辛未科歷任總鎮薊昌山西等處狀貌魁梧氣量恢廓明神宗謁陵甚奇之賜蟒玉及饌眷注甚隆薊鎮功績積最且雅好吟咏號盛世福將云卒賜祭葬

同上

殷禮宣德人性至孝鬻薪自給猶日求甘美養親金貞祐中宣德陷蒙古元帥盡驅居民出城父盛及禮俱與焉俄而下令凡老者殺無留士卒聞命方以殺爲嬉勢將向盛遂潛往代死伏其父於身下以兩手據地俛而延頸待之士卒辨視未審禮頂

宣化縣新志

卷十三

人物志上

二十四

腦因中二刀至夜半始甦後二日令再下無老幼盡殺時禮已
以善舞劍被選而行次蔚州矣途聞其父死謂侶伴曰我且逃
歸葬父遂歸求父屍而得之負以涉河水傷脛至血出發母塚
下屍封識之乃還後以從征有功與二子俱爲顯官

同上

林茂卿宣德人年四歲父母俱疫死伯父哀而育之甫卅角時
詣塚墓前號慟欲絕新有果蔬必薦後伯父爲商贏于財五十
無子委茂卿家事日與其妻懇伯母前曰林氏單弱誠不忍伯
父絕傳也伯母悟爲置二妾未幾伯父母亡遺孕生二子彥卿
俊卿夫妻保抱護視之及壯有室欲析居茂卿力勸不可乃傾
囊悉歸二弟自領田百畝屋一區爲生厥後二弟交游匪人日

喪所有茂卿仍加賜給略無憤辭嘗曰我無伯父何以有今日也二弟尋亦感化爲善人而茂卿二子植構並能趾美科第顯仕於朝

同上

朱冕字景文宣府右衛人父卒事母葉孝養備至務得懽心母年至九十三病篤冕甚憂懼每夜顙天祈以身代母病尋愈後冕患項疽醫者望之輒走冕子俊泣曰吾父病竟不能瘥耶百方訪詢或告之保定有良醫可治此俊七日夜去其家得藥歸進病卽愈鄉人稱其孝有所自云

郭宗興宣府右衛人幼失怙事其母林備竭孝誠朝夕侍側必候顏色憂喜喜則自適憂則極意娛之林病宗興躬理藥粥至

宣化縣新志

卷十三 人物志上 二十五

不起乃爲治喪葬具務盡力曰舍此復何以用情也旣窆諸有服者強之返宗興跽泣曰歸無母宗興必不能生若諸親能聽宗興卽宗興死於此尙復奚憾邪諸有服者度不能強皆歸於是宗興取數椽自爲屋墓側居之夜則悲號晝則封殖比及三年林木蔚森縱橫俱成列指而望之無不知爲孝塚也有司上其事詔旌表里閭焉

宋傑字宗賢宣府左衛人每讀經史見古聖賢忠孝大訓及身能忠孝者輒矢志效之宏治十三年以貢卒業太學登選籍卽北旋養父母朝夕奉承惟謹惟恐少失親懼父有疾無頃刻不在旁湯藥必躬治衣帶浹旬不解有呼輒應比卒復哀毀至羸

瘠既葬日候母寢室清晨必焚香祈天願減已年益母率以爲常又親撰孝順歌梓之遍給鄉人囑其體踐其學尙躬行如此卒後劉都御史源清聞之裨有司祀於學宮以爲鄉先生云同上劉鸞字鳴盛宣府左衛人少攻經史爲庠生業蒸蒸進可大成年二十餘父母俱在貧不能娶躬爲朝昏饌飲以養備極敬誠母病疽口吮潰處勢就愈他病復乘取糞嘗之差其證竟不愈仰天號慟屢絕屢甦者因爲流涕旣葬囑其弟曰父幸步履輕健爾善事於家分我守母可矣遂居墓旁隨時上食如其生存晝負土築塚夜則伏苦悲鳴山魃野魅擾之盡置弗顧遠近哀憐共取蔬菜餽焉三年喪畢甫入城居養父無何病卒同上

宣化縣新志

卷十三 人物志上 一二十六

趙弼字良卿宣府右衛人嘗讀書敦尙孝義父昇疾侍醫藥不違卒哀毀踰禮比葬跽其母李請守塋母曰爾去我必念爾遠或不能至奈何且爾知有父矣顧不知有母耶弼悟而止旣襄事每日蚤暮輒向靈筵致哀奉養其母比平素尤至母卒一如喪父哀毀合窆之日卽結廬其傍悲號無間三年歸設牀几寢幃懸父母小像其內如常定省歲節偕妻子祀之盡誠信焉事聞詔旌其門曰孝行同上孟文恭宣府左衛人父老奉事甚謹有疾輒憂懼夜向天祈以身代後竟卒文恭以禮葬之卽日結廬其傍朝夕哭奠親負土石築爲墳臺遠近稱孝焉三年有司上其事詔優恤令樹坊門

閭以旌之

同上

陳國寶宣人也任前衛指揮使性孝友國人稱之兩弟同居煦煦如也究心兵書至營陳奇門詩文掌故靡弗通曉然沈摯寡言而貌若不及萬歷甲戌以武舉高第晉秩都指揮同知歷任專城暨爲闈司爲京營所在有聲穆陵升祔時冬方暖國寶預令十二羽林備衝寒之具諸不備者或墮指裂膚而所部如練續焉謝政里居囊橐蕭然就市藥餌與瘡痍者共之以疾問者無虛日感宗支塗人常創爲譜牒藏於家

同上

王道舒字思容都司學生明戚畹天瑞叔也居賜第生母景氏蚤逝事繼母劉克盡子職愉色婉容一若生母妻劉繼逝或勸

宣化縣新志

卷十三

人物志上

二十七

其續絃蹙然曰吾子女皆足儻遇一不類婦奈吾母何終身不再娶士大夫高其義稱爲李同曾閔生子三長天鑑其元配張恭人系出名門上事舅姑承顏體志無敢少懈亦以孝稱人謂思容以孝子而得孝婦有天道云

同上

胡達可字仲正本衛茂才未冠失怙諸弟多在襁褓躬自教育婚娶以畢及析箸於田產器物獨取瘠且敝者爲妹擇壻奩具極一時之盛人謂與汝南薛包先後媿美握家政廿載分錫無私惟殷殷以積德惜福自持垂老不倦早歲力學欲繼父祖之緒乃竟不遇賚志而卒其子以溫孫顯祖俱髫年獲雋亦似天有默酬之者

同上

清

馬勝龍字雲生宜府人明總兵大川士麟之長子中崇禎武舉國朝累官廣西桂林遊擊時闖賊餘黨猶熾賊首李定國聚衆數萬犯桂林龍集部卒勉以忠義閉門固守糧盡城陷仍奮勇巷戰殺賊百十人遂遇害繼妻郭聞之自刎其仲弟從龍時隨任亦慷慨赴鬪死於難事聞詔賜半葬季弟武舉猶龍萬里尋骸殯葬人咸稱其友弟康熙十一年五月入祀鄉賢同上

黃洲字闔仙號子喬宜府人由武進士官山西平魯衛遊擊時大同總兵姜驥叛協洲從已洲曰吾家世篤忠孝豈肯從逆耶乘間奔督兵八王帳下隨營效力逆平晉陝西固原城守叅將

宣化縣新志

卷十三 人物志上 一二十八

奉檄勦靜寧州盜適與賊值力戰遂擒賊首侯生友等五人殺傷無算餘賊敗走洲單騎追至鐵帽堡賊衆萬弩齊發洲面中三矢越三日死此順治十二年十二月事也提督王一正匿不敢奏後長予吏科給事鼎楫另有傳每欲具疏終以不果同上

王天鑑字近微宣府前衛人順治丙戌進士除恩縣令時流寇餘孽嘗竊發天鑑至治樓櫓濬隍塹按地立十九寨募鄉兵掩捕賊渠復奉檄征他邑盜盡平之政聲大著舉卓異行取禮部主事甲午典試山東稱得人乙未擢河西叅議絕餽遺肅吏治討軍實禁腴削人歌頌之尋謝歸構別墅顏曰墨莊藏書數千卷日事嘯咏甲寅魏少司農象樞疏薦堅以疾辭性孝友廉正

門人蕭侍讀視學上谷屏書勿通邑人皆稱其賢年六十卒公舉崇祀

讀鎮志

胡以溫字公嶠號東甌一號書巢其先忻州人洪武中占籍宣府父達可本衛茂才以友愛稱以溫年二十三舉順治丙戌進士除江西樂安縣邑有巨豪殺人前令不敢問至是持千金爲賂却不受竟抵其罪有不善者其族請置於死召至反覆曉譬因叩首乞改後竟自新會總兵金聲桓叛所在多殺長吏應之樂安數十人操刃擁以溫出有兩人左右護持因得免難問之一爲被豪殺者之親一卽釋罪以勵其改者也後部議罷職年方二十有八家居四十餘年絕意仕進所著有辨學編洙泗言

宣化縣新志

卷十三 人物志上 二十九

仁錄補道因集蠡測編文章具體山堂清玩騷體讀書論世管見見山堂文彙詩彙等集又有續宣鎮志前明嘉隆後邊事賴以考云

舊縣志

李承鑛鎮城人由順治丁亥進士八年授湖廣房縣令時川賊未靖出沒無時承鑛率鄉民控禦未幾羣賊圍城外援不至遂陷被執罵不絕口賊怒支解之後鄉人公舉其事崇祀鄉賢

舊縣志

姚之夔字龍友宣化人由廩生入國學授柳州州判灘河名三十六斗七十二灘者水石衝激屢壞舟之夔奉檄往視築堤鑿石險者以平上官知其才屢委署篆在南寧詳免省餉遠解在

東蘭親詣蠻洞諭輸積逋丙寅調任太平按僞筭時多脇從不志

詳某事之夔力言于上官令自首付火保全者衆尋陞廣東提舉

親理場竈疏通鄉引商民便之以丁艱歸不復出居家以孝友

稱同上

姚永熹宣府人父熙吾任陝西興安令隣邑郇陽失守人民多奔興安命熹代為訓練保障鄉民總鎮康廉其才題授興安中營都司未幾竹山劉二虎圍興安永熹拒之中礮死子之愷為郡名宿之愷子文光壬戌進士歷官思恩知府自政績陞雲南副使卒之愷以子貴三受封焉同上
馬瑞麒字祥芝宣府前衛人由順治乙未武進士官長沙都司

宣化縣新志

卷十三 人物志上 二十

值寇李來恆竊據西山討平之全活被擄婦女無算旋以註悞降職三藩叛逆瑞麒隨征恢復寧州擢授寧州營守備賊圍艾城倉卒定亂以功陞遊擊賊再攻城東門發神銃立斃之又擊賊于白茅衝九都等處斬俘其衆賊遁去寧民樂業建碑祀之再調四川冕山營致仕歸年七十四卒同上

劉嗣俊字秀乾宣府人中順治戊戌武進士姪延祉中康熙丁未武進士嗣俊任湖南天柱營守備延祉任湖北南潭守備吳逆叛襄陽總兵楊來嘉從賊遣人招降延祉延祉乃斬使焚書賊兵至相拒於土地嶺力戰陣亡時康熙十三年八月也事聞賜祭

崇祀 明年逆兵逼長沙有賊黨王守備李把總者持縣千總

書協嗣俊降賊時嗣俊已預爲備二人至率家丁環攻之手砍死僞守備及從賊三人李懼亟擁衆奔逃追擊至白里洲遇逆援兵至圍數重苦戰不得出被創而死時冬十二月二十五日其家丁劉信田訪亦從擊賊全被害同上

閻興邦字敬仲號梅公曾祖一棟世襲指揮同知祖正名總兵父師臯大同副將皆以興邦貴贈光祿大夫興邦幼從舅氏於浙與東南諸名士聯課藝聲華籍甚康熙癸卯舉於鄉甲辰謁選得西粵之馬平庚戌調補直隸新城縣地當孔道民爲郵遞苦累興邦至捐俸買驢馬數百頭散之民間以充役有集場不逞者恃莊頭以魚肉小民興邦時策一騎偵察之奸宄屏息期

宣化縣新志

卷十三 人物志上 三十一

年以才能擢守通州歷遷順天府尹戊辰巡撫河南閱四年調撫貴州又五年卒於官興邦勤敏諸事撫豫撫黔時凡有便于民者力爲奏請詳藝文志又嘗請廣黔省鄉試中額特旨俞允而天下鄉試之額因以盡增士林德之誥授光祿大夫卒予祭葬如例子紘璽歲貢生歷任工科掌印給事中家傳

黃鼎楫字巨公號闊儒死事叅將黃洲長子也洲亡鼎楫年甫十二居貧力學中康熙乙丑進士癸酉授陝西漢陰知縣值丁丑戊寅境內連歲荒旱倉中舊積穀數千石以備軍需鼎楫度清於上官必不允行竟率意分貸之邑民賴以存活立像祀焉庚辰行取戶部曹閱八月擢工科給事中壬午副江南省主試

榜發輿論帖然旋轉吏科掌印歷六年餘以言責自任嘗疏請

更定大計卓異事例大略謂各省大計卓異官字樣多與例不符皆由胥吏舞弊所致嗣後請責成督撫

並請隨本引見云云及東省被災州縣懇祈緩征凡二俱獲俞允又嘗

參奏某巡撫匿災不報狀奉旨着某明白回奏竟易其任時論

趨之在任時賜御書五言絕句詩一幅御製詩一部人獲一劬

乙酉覃恩勅授文林郎戊子歲罷官歸鼎楫性孝友父洲歿後

家中落日繕册十餘頁獲錢數十文養母夜則篝燈讀書夜分

始就寢以父死於寇難不獲申表既入諫垣屢欲面陳不果侍

直歸每涕泣終日謝政後適其弟鼎官陝西漳縣令以虧空被揭鼎楫

悉捐己貲產得二千餘金為之代償以故晚景益復貧困怡然

宣化縣新志 卷十三 人物志上 三十一

處之弗屑也年七十卒子二人錦圖錦雲孫大本康熙庚子舉

人有文品兼工書畫家傳

黑天池字南溟號鵬飛赤城籍宣化縣人前明殉節都督雲龍

之曾孫也幼敦行好學有聲膠庠中康熙己丑科進士辛丑選

授廣西義寧知縣邑有積盜秦某窩竊逞奸前任官俱莫能制

天池甫下車卽設法緝捕并餘黨就擒境內賴以寧息居官清

慎自矢而尤善拊循士民應試生童有資斧不給者出餘俸俸

助之又嘗請發倉儲之粟賑貸窮黎以給農事上官嘉其才會

疏保薦特擢南寧知府蒞任六年興利除弊威惠所至漢土官

民羣帖服焉庚戌陞任桂平梧鬱驛鹽道以疾卒於官府志

姚永康字晉侯宣郡都司人順治五年拔貢任遂安令慈祥大著尤請行社倉力新文昌大成諸祠廟綽有成蹟陞判平涼奉讞欽案餽遺卻不受獨持平具報得如法能聲蔚起後以矮屋莫展遂拂袖歸鄉居二十餘年與賢士大夫詩酒咏酬人比之香山洛下德望傾動人比之彥方太邱至成壩津梁一切義舉多解囊不吝二十六年壽彌高行彌邵值鄉飲衛官宋公之傑敦請大賓堅以疾辭殆彬彬退讓君子焉公仲嗣之牧任長樂令在邑濬陳塘港惠民頗如先公令遂安時後以母老牒請終養里人僉稱其孝云

舊縣志

姚永煦字載熙宣府都司人功苦力學丙午舉于鄉授真定教

宣化縣新志

卷十三 人物志上 三十三

授陞令新繁邑方數燬於兵原野蕭然至撫流亡墾荒蕪輕刑薄賦民居稍定秩滿陞濟寧牧州當水陸要衝時公年已七十餘白髮皤然案牘旁午猶早晏勤敏無叢脞者未幾以老疾辭年八十三卒邑人張喬年輓之云先生何忍遽騎箕緬想丰神若在茲歷下空傳遺愛頌蜀中猶護去思碑詞壇樹幟虛宗匠直道何人更主持和句寄來無幾日俄吟一曲淚如絲

同上

姚之愷字子和宣人也祖熙吾以明經歷任陝西興安牧父永燾偕隣邑郇陽被流寇失守父老奔興安托命燾代爲訓練保障鄉民後總鎮康廉其才題授興安中營都司越十日丁外艱未幾竹山劉二虎圍興安嚴裝往援中礮而死母杜矢節訓子

延師課讀公性嗜學自幼卽博覽羣書尤精時藝屢試冠軍人以名士稱之數上公車不售乃閉門著書講德論業執經問字者甚夥其領鄉薦捷南宮而以爵顯者都諫黃鼎楫中翰褚紱他皆多所建樹咸公之流澤也其課子尤力卒得名邑人張喬年錄成語贈之曰有子已成天下士無人不羨地中仙之句及除翰林庶常得貤封公堅卻不受曰吾掇青紫直分內事焉用是爲耶姻婭勸慰再四方領之上同

倪顯字日章號雲巢宣化人幼聰穎隨祖太保公讀書望海樓時年十六以祖廕授錦衣衛西司祖歿失怙家居養親值大帥駐宣利具貲謀中以飛禍母楊慮一線孤危促之補官遂任鑾

宣化縣新志

卷十三 人物志上 二十四

儀衛整儀尉歷任勤勞每考皆最尋陞冠軍使先是遵例陳言直指兵民疾苦獲俞旨直聲振一時屢奉覃恩母楊妻黑皆封淑人後以塋親陳情給假遂絕意仕進告病弗補日與姻友看花命酒吟哦不輟凡所題咏手錄成帙號轂音草年躋古稀道貌崖然壽七十九卒上同

張名世字時可別號五雲征西將軍國柱公之子博涉書史兼精琴音善行草書崇禎辛未考授文華殿中書舍人以征西病告歸適己屬纊哀毀踰禮服闋不仕惟徜徉山水彈琴賦詩自號愛雲老人又稱東臯野叟我朝定鼎中丞馮公欲登薦剡公固辭隱去人以此高之爲人慈厚亦多義舉如待異乳妹適劉

氏及外弟趙某資給極厚又龍門倪氏嘗貸五百金不能償卽焚其券皆爲人所難以子光烈貴贈奉政大夫崇祀鄉賢祠上同胡慧可字竺人號械室鎮城人啟禎間士學說異獨究心程朱抉性理諸書故文氣光昌詩慕七才子句尙奇警本朝丁亥拔貢庚寅授江西吉安府推官未幾筭蕘竊發奉檄按捕其渠乃尙藩下戚屬求釋不遂幾中危禍遂移疾歸年方三十餘也初公甫生卽孤家業凋零事母甚孝生平慷慨重氣誼亦多矜恤晚年謝絕交遊杜門教子今其家彬彬蔚起四子以濟領壬午鄉薦亦庭訓之報也上同

張光烈字觀揚號芝田順治戊子舉人乙未進士知夏邑邑多

宣化縣新志

卷十三 人物志上 二十五

狡獪槩置之法羣奸屏息其夙逋難征者立限期勤勸諭得無終逋又煮粥活饑禁民鬻子邑紳梁方伯卒于秦家有六櫬子幼難舉公爲代葬馬鬣纍纍人咸義之擢同知平陽府肅紀綱絕饋遺時榮河臨晉上官械逋糧者付公治之公盡去其械勅縣緩比次第報完蓋民不忍負公也臨汾缺令撫軍以公才委署其篆公爲革火耗禁雜派除衙蠹懲幫帖省民財約萬有餘金典史丁某歿代補解餉所折銀百有餘兩脫其內弟於械又資遣其輻以歸皆義舉也比謝事病卒吏民咸痛之上同周延基宣化縣人家貧艱於衣食與弟延屋日傭作得賃資輒易甘旨養父永燮及母馮曲慰其心順治戊戌母馮病基屋朝

夕慟哭焚香祝天願以身代竟不起呼天搶地聲惻隣里時遇荒年貧日益甚基屋俱未有室躬持爨或有勸其娶妻者皆曰繼祀事誠大顧目前老父年踰八十非肉不飽奉養事亦大值此凶歉力供菽水尙不給奚敢他望竭力承歡遇父迷曠欲加槌責基等卽伏地俛從不敢違責已仍曲求娛之至父歿亦如喪母時康熙辛酉里人公稟叅議楊公給銀八兩代之娶復賜匾曰孝行可風參將宋守備姜亦匾曰百善之先曰菽水承歡丁亥無軍趙又錫孝毓雙珠額以旌之上同張萬祚宣化前衛人行居次幼孤其長陞祚已授室父遺貲爲婚娶遭年荒陞祚拮据供炊莫給終不欲啟緘萬祚愀然曰肉

宣化縣新志

卷十三 人物志上 三十六

可剗尙啖母令饑而有室將安忍且年豐娶未晚也泣請用之終身兄弟怡怡和樂奉母無間言及歿哀毀骨立葬之日廬於墓側畚土成墳至朔望聲號四野終三年焉雲州守府馬公嘗以善孝可風額其門今猶待旌獎云上同

甄國忠宣化庠生事母孝闔學公舉其孝行於督學梅公允給匾旌表焉上同

流寓

金

夾谷士刺字大用上京阿懶路人泰和三年進士由撫寧海濱主簿歷官武寧軍節度副使興定初拒宋兵於泗州以功遷兩

階四年召爲戶部員外轉刑部遷郎中元光初授京南路司農少卿正大初擢裕州刺史改睢州四年授同知中京留守兼同知金昌府事改汝州防禦使又改陳州防禦使超授同知開封府事正大六年授武寧軍節度兼徐州管內觀察河防等使行樞密院事踰年告歸初貞祐時宣宗南遷土刺留次子斜烈於北後任元官先鋒使金亡斜烈奉朝命迎土刺北歸居於宣德土刺以身見代謝愴然傷懷居常倍自貶損時貴有欲謁見者皆不得通惟與渾源魏邦彥爲文字友後五年卒塋永興縣王家堡西北原

詳見藝文

周昂字德卿真定人年二十二擢第調南和簿有異政遷良鄉

宣化縣新志

卷十三 人物志上 二十七

令入拜監察御史路鐸以言事被斥昂送以詩語涉謗訕坐停銓久之起爲龍州都軍以邊功復召爲三司官大安兵興權行六部員外郎其甥王若虛嘗學于昂昂教之曰文章工于外而拙於內者可以驚四筵而不可以適獨坐可以取口稱而不可以得首肯又云文章以意爲主以言語爲役主強而役弱則無令不從今人往往驕其所役至跋扈難制甚者反役其主雖極詞語之工而豈文之正哉昂孝友喜名節學術醇正文章高雅諸儒皆師尊之坐詩得罪謫十數年始入翰林言事愈切出佐三司非其所好從宗室承裕軍承裕失利跳走上谷衆欲徑歸昂獨不從城陷與其從子嗣明同死於難

全史本傳

嗣明字晦之短

小精悍有古俠士風年未三十交遊半天下識高志大善談論而中節詩簡澹溫麗最長義理之學試于府于禮部俱第一擢第主涑水簿從其叔北征得還不忍去蓋嗣明文字不及其叔而理性過之嘗謂學不至邵康節程伊川非儒者也其說類此

金李純甫屏山故人傳

元

歸陽字彥溫汴梁人學無師傳而精敏過人登至順元年進士授同知潁州轉大都儒學提舉未上後至元五年杞縣人范孟謀不軌詐爲詔使殺河南行省平章月魯帖木兒不花等詔官屬及去位者署而用之陽時在汴賊召使北守黃河口力拒不

宣化縣新志

卷十三 人物志上 三十八

從賊怒繫之獄尋以賊敗獲免同里有吳炳者嘗以翰林待制徵不起至是汙僞命時人爲之語曰歸陽出角吳炳無光自此名譽赫然明年拜監察御史及入謝臺臣奏曰此卽河南抗賊者也帝曰好事卿宜數爲之賜以上尊已而辭歸養親至正五年除僉河南廉訪司事六年轉僉淮東七年遷右司都事順江酋長求內附請立宣撫司置郡縣陽曰古人有言鞭雖長不及馬腹使郡縣果設有事不救則孤來附意救之則罷中國所謂獲虛名而受實禍也與左丞呂思誠抗辨甚力丞相伯顏笑曰歸都事善憇然其策果將焉出陽曰其酋長可授宣撫弗責其賦稅使者賜以金帛遣歸足矣卒從陽京師苦寒有丐訴丞相

馬前丞相索皮服予之且覈在官皮服將悉給貧民陽曰宰相當以廣濟天下爲心皮服之給能幾何不若錄寒饑者稍賑之耳丞悟而止之湖廣行省沙班卒其子沙的爲中書掾請奔喪丞相以有兄弟不許陽曰孝者人子之同情以其有兄弟而沮其請非所以孝治天下也遂從之八年陞左司員外中書用其言損河間餘鹽五萬引以裕民又諫以楮幣易銀實內藏尋遷叅議樞密院時江浙行省朶兒只丹討方國珍兵敗爲所獲國珍遣人從朶兒只丹走京師請降陽曰國珍敗我王師又拘我王臣力屈而來非眞降也必討之以令四方朝廷事姑息不從後果屢叛九年進禮部會開端本堂皇太子就學召爲贊善陽

宣化縣新志

卷十三

人物志上

三十九

言師傅當與皇太子東西相向授書不然師道不立卒從其議尋以疾辭歸在上都日脫脫自甘州還將入相屬陽草詔陽不可後屢遷參知政事刑部尙書不就十七年授集賢學士與疾至京不起上三策曰振紀綱選將材審形勢疊疊數千言時不能用乃以資德大夫致仕僑居宏州徙蔚州又徙宣德二十七年卒

府志

明

張壽朋字大復江西臨江人萬歷進士以事謫萬全都司斷事時萬歷丙申巡撫王象乾延之課士于上谷書院壽朋素工字學有文名宣士甚尊禮之有選梓古今文集十餘種

舊縣志

需弗山人黃姓逸其名江西撫州人明崇禎末來燕京上書值流寇亂遂出居庸關黃寇道衲止於鎮城朝元觀與宣之人士講性命之學著心要閨要兵要三書及在宣題咏諸詩稿臨終時悉焚之曰身既隱焉用文

舊縣志

清

李良年字武曾浙江嘉興人康熙初來遊宣府主鎮人胡大令以溫家良年學瞻文逸負海內望在其鄉時與秀水朱燹尊錫鬯嘉興譚吉惣舟石諸子齊名而其兄繩遠字斯年弟符字分虎或有聲于時號禾中三李康熙己未舉博學宏詞科罷歸隱於鄉所著有秋錦山房集

同上

宣化縣新志

卷十三

人物志上 四十

林盛字大林湖廣黃州人以明經入國學乃北遊宣化盛以詩文自豪同時官斯土者多楚人咸相推重宣化西寧及懷安志初稿實出其手所著有此遠堂詩文集若干卷經世錄若干卷

府志

胡作舟字乘木大川湖廣武昌人雍正癸卯孝廉高才不偶以文章經術授學宣府郡人子弟經其指授者作文咸有軌法其詩歌古文苕發穎豎纏纏不羈素性耿介當事多重其才與相款洽作舟布衣紉屨笑傲其間杯酒劇談之外未嘗少以私干也遇有不合卽拂袖去乾隆七年正月猝中寒疾歿舍館人褚世暉篤誼士也爲治喪具召其子釀金歸之

府志

張元懷字莘田宣化縣人康熙戊子科舉人癸巳恩科進士由翰林院改授工科給事中戶科掌印給事中巡察河外轉廣西按察司使陞授廣西布政司使調安徽布政司使署河南巡撫以事降甘肅安西兵備道尋被召卒於京公少讀書有大志官翰林不屑屑雕虫小技受世廟知遇置言路挺拔自立思所建白會巡視中州時田公文鏡總制河東文飾吏治察屬安民稱爲天下最公入境則劾守土官之不職者數人又以河南歲連歉奏請截漕米十萬石備賑糶田公力持之公奏蒙報可田公銜焉後署河南撫篆多反田公政解篆回浙田公撫拾其事屢劾之皆蒙恩鑒最後以故出人罪題參部議降職公所至務以

宣化縣新志

卷十三

人物志上

四十一

寬大持政體在廣西積獄千百人淹滯經年瘐死無算公至奏請盡出之分別案結數日囹圄爲空

府志

以上根據府志參照縣志按朝代先後順序編入依舊例也此後新增人物若參列其中甚形雜亂故分孝友儒行武略義方貞烈五類以區別之是變例也



